

Evening Dogri (NSD) Bulletin 28-09-2024

आकाशवाणी

खास खास ...

- 1 संयुक्त राष्ट्र महासभा च पाकिस्तान दे प्रधानमंत्री शाहबाज शरीफ हुदे जम्मू कश्मीर दे जिक्र पर भारत नै प्रतिक्रिया दित्ती।
- 2 राष्ट्रपति द्रौपदी मुर्मू होरें महिलाएं खलाफ अत्याचारें पर चैंता बुज्जी।
- 3 प्रधानमंत्री नरेन्द्र मोदी होरें आखेआ जे उंदी सरकारै 2014 च सत्ता च ओने दे मगरा सशस्त्र बलें लेई इक रैंक इक पैंशन योजना शुरू कीती ही।
- 4 प्रधानमंत्री नरेन्द्र मोदी होरें हरियाणा दे हिसार च इक जनसभा गी संबोधत करदे होई कांग्रेस दी नुक्ताचीनी कीती ते आखेआ जे कांग्रेस नै दलीलें ते पिछड़े वर्गें लेई बुए बंद कीते दे न।
- 5 जम्मू कश्मीर च त्रीए दे खीरले गेड़ दे असेंबली चुनाएं लेई 40 सीटें पर प्रचार कल सम्पन्न होआ'रदा ऐ।
- 6 भारत, नेपाल गी 4-2 कन्नै हराइयै एसएएफएफ अंडर-17 चैंपियनशिप दे फाइनल च पुज्जी गेआ।



India-Pak UN

संयुक्त राष्ट्र महासभा च पाकिस्तान दे प्रधानमंत्री शाहबाज शरीफ हुंदे राएं जम्मू कश्मीर दा जिक्र कीते जाने पर भारत नै कड़ी प्रतिक्रिया दित्ती ऐ। भारत नै आखेआ ऐ जे सैनिक शासन, आतंकवाद, नशीले पद्धार्थे दी तस्करी ते अंतर्राष्ट्रीय अपराधें आस्तै पूरी दुनिया च बदनाम पाकिस्तान जनेहा मुख्य दुनिया दे सब्बने शा बड्डे लोकतंत्र दी आलोचना करा'रदा ऐ। संयुक्त राष्ट्र महासभा च इक सत्र

गी संबोधत करदे होई भारतीय राजनायिक भाविका मंगलानंदन होरें गलाया जे पूरी दुनिया गी पता ऐ जे पाकिस्तान केई चिरे थमां गै अपने गंवाढिएं दे खलाफ बन्ने पार थमां आतंकवाद गी इक थेआरे दे रूपै च इस्तेमाल करा'रदा ऐ। उनें इब्बी आखेआ जे पाकिस्तान गी एह समझी लैना लोडचदा जे भारत खलाफ बन्ने पार थमां आतंकवाद गी बढ़ावा देने दा अंजाम उसी भुगतना होग।

<><><><><><>

President

राष्ट्रपति द्रौपदी मुर्मू होरें आखेआ जे सच्चाई बड़ी ताकत ऐ। एहदे नै कनूनी बिरादरी सशक्त बनदी ऐ। हैदराबाद च नालसर यूनिवर्सिटी दे 21मं दीक्षांत समारोह गी संबोधत करदे होई राष्ट्रपति मुर्मू होरें समाज दे हाशिए पर खड़ोते दे वर्गे गी सामाजिक न्यांह दोआने लेई कम्म करने दी जरूरत पर जोर दित्ता। राष्ट्रपति होरें बेहतर प्रदर्शन करने आलिएं कुड़िएं दी सराहना कीती ते उनेंगी महिलाएं दे सशक्तिकरण लेई कम्म करने लेई आखेआ। उनें महिलाएं पर होआ'रदे अत्याचार पर चैंता बुज्जदे होई आखेआ जे एहदे खलाफ सब्बनें गी मिलियै कम्म करना चाहिदा। उनें विद्यार्थिएं गी लक्ष्येग ी हासल करने दी दिशा भेठा जतन करने दस आह्वान बी कीता। राष्ट्रपति होरें शानदार प्रदर्शन करने आले विद्यार्थिएं गी सुन्ने दे तगमे प्रदान कीते। तेलंगाना दे गवर्नर जिष्णु देव वर्मा, तेलंगाना दे मुख्यमंत्री ए.रेवत रेड्डी, न्यायधीश पी.एस.नरसिम्हा ते नालसर यूनिवर्सिटी दे चांसलर ओलाक राधे इस मौके पर उत्थें मजूद हे।

<><><><><><>

PM-MKB

प्रधानमंत्री नरेन्द्र मोदी होर मन की बात कार्यक्रम राएं अपने बचार देश ते बाहरे मुख्खें दे लोकें कन्नै सांझा करगंन। एह कार्यक्रम कल यानि 29 सितम्बर गी बडलै 11 बजे आकाशवाणी पर प्रसारत कीता जाग। इस म्हीनेवार कार्यक्रम दी

एह 114मीं किशत होग। त्रीह बारी प्रधानमंत्री बनने परैत प्रधानमंत्री हुंदे इस कार्यक्रम दी एह चौथी किशत होग। मन की बात कार्यक्रम दा प्रसारण सारे आकाशवाणी ते दूरदर्शन नेटवर्क, ए.आई.आर वैबसाइट, न्यूज़ ऑन एयर मोबाइल ऐप पर कीता जाग। एयर न्यूज़, डीडी न्यूज़, प्रधानमंत्री हुंदे दफतर ते सूचना ते प्रसारण मंत्रालय दे यूट्यूब चैनलें पर बी इस कार्यक्रम दा सिद्दा प्रसारण कीता जाग। आकाशवाणी दे क्षेत्रीय चैनलें दे बाद इंदा मकामी भाषाएं च अनुवाद प्रसारत कीता जाग।



PM HM Tributes

अज्ज महान स्वतंत्रता सेनानी अमर शहीद सरदार भगत सिंह हुंदी जनम जयंति ऐ। इस मौके मुख्य भरै च उनेंगी श्रद्धांजलि देने लेई केई कार्यक्रमें दा सरिस्ता कीता जा'रदा ऐ। प्रधानमंत्री नरेन्द्र मोदी ते गृहमंत्री अमित शाह होरें इस मौके उनेंगी श्रद्धांजलि भेंट कीती। इक सोशल मीडिया पोस्ट पर मोदी होरें शहीद भगत सिंह होरें गी नमन करदे होई आखेआ जे ओह इक ऐसे अमर स्वतंत्रता सेनानी हे जिनें मातृभूमि दी शान ते सम्मान दी खातर अपनी जिंदू दा बलिदान देई दितता हा। गृहमंत्री होरें बी इस महान शहीद क्रांतिकारी गी चेता करदे होई आखेआ जे उनें अपनी हिममत, दलेरी ते देशप्रेम दी ताकत दे बल पर ना छड़ा अंग्रेजी हकूमत गी ललकारेआ हा सगुआं देश दी अजादी ते सनैहरे भविकख लेई अपनी जिंद-जान कुर्बान करी दित्ती ही। शाह होरें आखेआ जे भगत सिंह हुंदे बलिदान नै अजादी दी लड़ाई गी बड़ी मती ताकत दित्ती।



PM OROP(byte)

प्रधानमंत्री नरेन्द्र मोदी होरें कांग्रेस पर आरोप लाया जे उन्नै मुख्यै लेई अपनी जिंदू दा बलिदान देने आलें दा कदें मान नेई कीता ते ओहूदे राज च साढे

फौजिएं दे परोआर वन रैंक वन पैंशन लेई तरसदे रेह। आकाशवाणी दे जम्मू संवाददाता मूजब अज्ज जम्मू च अपनी चुनां रैली च मोदी होरें आखेआ जे 2014 च उंदी सरकार बनने दे बाद “वन रैंक वन पैंशन” लागू कीता गेआ ते अजें तोड़ी फौजी परोआरें गी 1 लक्ख 20 ज्हार करोड़ रपे हासल होई चुके दे न।

<><><><><><>

PM Rally Hisar

भारतीय जनता पार्टी दे वरिष्ठ लीडर ते प्रधानमंत्री नरेन्द्र मोदी होरें हरियाण दे हिसार च इक जनसभा गी संबोधत कीता। इस मौके पर बोलदे होई मोदी होरें कांग्रेस पर दोष लाया जे कांग्रेस दे बुए, दलील ते पिछड़े दे वर्ग दे लोकें लेई पूरी चाल्लर नै बंद न। हरियाण कांग्रेस च लग्गी—लग्गी ते अंदरूनी कलाह पर चुटकी लैंदे होई प्रधानमंत्री होरें आखेआ जे पार्टी दे अंदर लोकें लेई चैंता दस्सने दे बजाए अपना दबदबा कायम करने लेई लड़ाई चला'रदी ऐ।

<><><><><><>

JK Campaign

जम्मू कश्मीर च विधान सभा चुनाएं दे त्रीए ते खीरले गेड़ लेई अभियान कल समाप्त होई जाग। 40एं असैंबली सीटें लेई चुनाएं दा खीरी गेड़ पैहली अक्टूबर गी होग जेहदे च जम्मू खित्ते दी 24 सीटां न। इंदे च जम्मू जिले दे 11 हल्के, कठुआ जिले दे 6, उधमपुर जिले च 4 ते सांबा जिले च 3 हल्के न। आकाशवाणी जम्मू संवाददाता हुंदी रिपोर्ट मूजबराजनीतिक पार्टियां मतदाताएं गी प्रेरित करने आस्तै रोड शो, गल्लबात ते रैलिएं दा आयोजन करा'रदियां न। जित्थे इक बक्खी प्रधानमंत्री होरें जम्मू च इक बड्डी चुनावी रैली गी संबोधित कीता उत्थे गै दुई बक्खी साबका मुख्मंत्री ते डेमोक्रेटिक प्रोग्रेसिव आजाद पार्टी दे प्रधान गुलाम नबी आजाद ते कांग्रेस नेता प्रियंका गांधी होरें बी जम्मू खित्ते च चुनावी रैलिएं गी संबोधित कीता। गुलाम नबी आजाद होरें चुनावी रैली दरान दफा 370 दे मसले पर नेशनल कांफ्रेंस ते कांग्रेस पर जबानी हमला कीता। उनें आखेआ जे

छड़ा भारत सरकार गै जम्मू-कश्मीर गी विशेष अख्तियार देने आहले इस कानून गी परतियै ब्हाल करी सकदी ऐ। जम्मू च पत्रकारें कन्नै गल्ल करदे होई आजाद होरें आखेआ जे प्रधानमंत्री नरेन्द्र मोदी ते गृह मंत्री अमित शाह होरें जम्मू-कश्मीर दा राज्य दा दर्जा ब्हाल करने दा पैहले गै वायदा कीते दा ऐ ते कांग्रेस दा एहदे कन्नै किश लैना-देना नेई ऐ। उनें आखेआ जे नां ते नेशनल कांग्रेस ते नां गै पीडीपी नै संसद च दफा 370 ते राज्य दा दर्जा ब्हाल करने बारै किश आखेआ ऐ ते असलियत एह ऐ जे इनें कोई राज्य नेई छड़ी भारत सरकार गै ब्हाल करी सकदी ऐ। कांग्रेस नेता प्रियंका गांधी होरें बिश्नाह च चुनावी रैली कीती। उनें आखेआ जे लेफ्टिनेंट गवर्नर मनोज सिन्हा होर आपूं बाहरै दे न ते ओह जम्मू-कश्मीर दे आम लोकें दे मसलें गी हल नेई करै करदे। उनें आखेआ जे जम्मू-कश्मीर लेई मुकामी नेता दी लोड़ ऐ जेहड़ा इत्थुं दे लोकें दिएं समस्याएं ते दिक्कतें-परेशानिएं गी हल करोआई सकै।

<><><><><><>

JK PM Rally(byte)

बीजेपी दे वरिष्ठ लीडर ते प्रधानमंत्री नरेन्द्र मोदी होरें अज्ज आखेआ ऐ जे जम्मू कश्मीर दे लोक रमानदारी ते अपने बच्चें लेई बेहतर भविक्ख चांहदे न। आकाशवाणी दे जम्मू संवाददाता नै जानकारी दित्ती ऐ जे अज्ज जम्मू च इक चुनां रैली गी संबोधत करदे होई मोदी होरें आखेआ जे जम्मू कश्मीर विधानसभा चुनाएं दे पैहले दऊं गेड़ें च भारी गिनतरी च लोकें आस्सेआ वोट पाए जाने, एह साबत करदा ऐ जे इत्थूं दे लोक अमन ते खुशहाली चांहदे न ते भारतीय लोकतंत्र च उंदा गैहरा विश्वास ऐ। प्रधानमंत्री होरें अग्गे आखेआ जे जम्मू कश्मीर दे लोक त्रऊं परोआरें- कांग्रेस, नैशनल कांग्रेस ते पीडीपी कोला तंग आई चुके दे न ते ओह इत्थें परतियै भ्रश्टाचार ते फर्कोफर्की आली बवस्था नेई चांहदे। उनें आखेआ जे लोक इत्थें बीजेपी दी सरकार चांहदे न जिन्नै इत्थें रमानदारी, तरक्की ते खुशहाली दे इक नमें दौर दी शुरूआत कीती ऐ।

प्रधानमंत्री होरें 2016 च अज्जै दे रोज पाकिस्तान दे खलाफ कीती गेदी सर्जिकल स्ट्राइक आली कारवाई गी चेता करदे होई आखेआ जे इस्सै रोज भारत नै पाकिस्तान दे अंदर बढियै आतंकी ठकाने गी तबाह कीता हा।

<><><><><><>

NC-Omar

नैशनल कांफ्रेंस दे उप-अध्यक्ष ते बडगाम ते गांदरबल थमां पार्टी मेदवार उमर अब्दुल्ला नै बीजेपी दे लीडरें दे दावें गी खारज करी दित्ता जे जम्मू कश्मीर च अगली सरकार ओह बनांगन। अज्ज कुपवाड़ा च पत्रकारें कन्नै गल्लबात करदे होई उमर अब्दुल्ला होरें आखेआ जे बीजेपी इत्थें कदें सरकार नेई बनाई सकदी की जे जम्मू कश्मीर दे लोक घाटी च बीजेपी दी कठपुतलियें दे तौरा चुनां मैदान उमरे दे मेदवारें गी खरी खल्ली पंछानदे न।

<><><><><><>

Footbal

फुटबाल च भारत नै भूटान दे थिम्फू च चांगालिमिथांग स्टेडियम च एसएएफएफ अंडर-17 2024 चैंपियनशिप दे जबरदस्त सैमीफाइनल मैच च नेपाल गी 4-2 कन्नै हराया। पैहले हॉफ च कोई बी गोल नेई होने दे मगरा भारत लेई ऋषि सिंह हेमनेई चुंग लुंकिम नै इक7इक ते विशाल यादव नै दो गोल कीते। नेपाल लेई सुवाष् बम नै मैच दा अपना पैहला गोल कीता। जिसलै के भारत दे मोहम्मद कैफ हुंदे आन गोल नै नेपाल गी अंतर घट्ट करने दा मौका देई दितता। फाइनल 30 सितम्बर गी खेड्डेआ जाग। भारती, पाकिस्तान ते बंगलादेश बश्कार दुए सैमीफाइनल दे विजेता खलाफ खेड्डोग। एहदे इलावा भारत एसएएफएफ अंडर-17 दा 5 बारी दा विजेता ऐ ते पिछले बारी उन्ने फाइनल च बंगलादेश गी 2-0 कन्नै हराया हा।



India Steel

फौलाद दे भारती उद्योग दे राज्यमंत्री भूपति राजू श्रीनिवास होरें आखेआ जे भारत इक ज्हार 440 करोड़ टन फौलाद दा उत्पादन करने कन्नै इसलै इस क्षेत्र दा दुआ बड्डा उत्पादक बनी गेआ ऐ। नमीं दिल्ली च त्रै रोजा अंतर्राष्ट्रीय कांफ्रेंस गी संबोधत करदे होई मंत्री होरें फौलाद क्षेत्र च तकनीक कन्नैजुड़े नमें तरीकाकार ते सामग्री दक्षता दी बड़ेयाई कीती। उनें आखेआ जे इस तरक्की बाद्धे कारण गै फौलाद दा उत्पादन तकरीबन 2 अरब टन दे कोलकाल पुज्जी गेआ ऐ। श्रीनिवास होरें दस्सेआ जे फौलाद क्षेत्र दा भविक्ख डिजीटलीकरण ते टिकाऊ फौलाद उत्पादन उप्पर बनाया जाग तां जे कार्बन उम्सर्जन दे स्तर गी घट्ट शा घट्ट कीता जाई सकै। उनें उद्योगें गी बी अपील कीती जे ओह प्रक्रिया नवाचार ते प्राथमिक ते माध्यामिक धातु उत्पादक दौने मझाटै मजबूत सैह्योग दे राएं घट्ट कार्बन आली धातु उत्पादन बक्खी जाने लेई आखेआ।



Lata

अज्ज स्वर कोकिला लता मंगेशकर हुंदी 95मीं जयंति ऐ। 28 सितम्बर 1929 गी इंदौर च पैदा होई दी इस महान गायिका नै केई दहाकें तगर अपनी दिलकश अवाज कन्नै करोड़ें लोकें गी मंत्रमुग्ध कीता ते उंदे गीए दे गीत सदा सदा लेई इक अनमोल खजाने दे रूपै च अमर होई गे। गायकी दे अपने 70 ब'रे कोला बी लम्मे सफर दरान उनें केई भाषाएं च 25 ज्हार कोला मते गीतें गी अपनी जादुई अवाज दित्ती। भारत रत्न कन्नै सम्मानित इस महान गुलूकारा नै बनसब्बनताएं भरोची अपनी गायकी दी शेली कन्नै केई पीढ़िं गी प्रेरत कीता ते अग्गे बी करदियां रौंहगन। 6 फरवरी 2022 गी 92एं ब'रें दी उमरी च उंदा काल होई गेआ हा। प्रधानमंत्री नरेन्द्र मोदी होरें लता मंगेशकर होरें गी उंदी जयंति दे मौके पर चेता करदे होई आखेआ जे अपने भावें भरोचे गीतें दे कारण ओह सदा सदा लेई

लोकें दे दिलें पर राज करदियां रौंहगन। अपने सनेए च उनें आखेआ जे उंदा
हिर्ख ते शीरवाद हासल करियै ओह् अपने आपै गी मता भागें आला समझदे न।

<><><><><><>

